

22 JAN 2003

RAIS, DOMPOK KE AFRIKA SEBAGAI UTUSAN KHAS SIDANG KEMUNCAK NAM

KUALA LUMPUR, 22 Jan (Bernama) -- Menteri di Jabatan Perdana Menteri (JPM) Datuk Seri Dr Rais Yatim dan Tan Sri Bernard Dompok berlepas ke Afrika sebagai Utusan Khas untuk mengundang para pemimpin negara anggota Pergerakan Negara-negara Berkecuali (NAM) ke sidang kemuncak pergerakan itu di ibu negara dari 20 hingga 25 Feb ini.

Menurut satu kenyataan yang dikeluarkan oleh pejabat Rais hari ini, Rais malam tadi berlepas ke Niger, Kenya dan Cameroon manakala Dompok ke Ethiopia, Eritrea dan Chad.

Kedua-dua Menteri itu akan menyerahkan undangan rasmi dan surat daripada Perdana Menteri Datuk Seri Dr Mahathir Mohamad kepada rakan-rakan sejawatan mereka di negara-negara berkenaan.

Beberapa Menteri lain turut dilantik sebagai Utusan Khas kerajaan untuk mengundang ketua negara dan kerajaan untuk menghadiri sidang kemuncak NAM itu.

Mereka ialah Menteri Penerangan Tan Sri Khalil Yaakob yang ditugaskan ke Bahamas, Barbados, Guyana dan Suriname; Menteri Pembangunan Luar Bandar Datuk Azmi Khalid Ke Turkmenistan, Uzbekistan, Tunisia dan Oman;

Menteri Perpaduan Negara dan Pembangunan Masyarakat Datuk Dr Siti Zaharah Sulaiman akan ke Mongolia manakala Menteri Tenaga, Komunikasi dan Multimedia Datuk Amar Leo Moggie akan ke Guinea-Bissau, Guinea, Senegal, Mali dan Mauritania.

-- BERNAMA

SHI MFJ PR